

昨  
非  
庵  
日  
纂

昨非菴日纂敦本卷之四

身不託空桑。自家佛不供。養及時。迫至廢蓼。  
莪而已。晚性豈甘。燃豆同根。生不滋培。置力  
能無歌蟬。蟬以生。慙古人急象賢。施幹蠱咏  
棠棣。賦鵲鳩。每一開函。泫然淚下。纂敦本第  
四。

昨非菴居士鄭瑄識

王祥事後母甚謹。家有一李樹。結子。母使守之。  
風雨忽至。祥抱樹而泣。祥在別牀眠。母往聞。

斫之。值祥私起。空斫得被。旣還。知母憾之。不  
已。因跪前請死。母於是感悟。愛如已子。  
孔北海被收時。男方九歲。女纔七歲。以幼弱得  
全。寄住他舍。主人遺以肉汁。男飲之。女曰。今  
卜之禍。何能知肉味乎。或言於曹操。收之。將  
加戮。女謂兄曰。若死而有知。得見父母。豈非  
至願。乃延頸就刑。

燕泰肅王。輕施厚費。常預借料錢。多至數歲。仁

宗詔給者屢矣。御史沈邈謂不可以常典奉  
無厭之求。上曰。御史誤矣。太宗子八人。今惟  
王爾先帝之弟。朕之叔父也。每恨不能盡天  
下以爲養。數歲之祿。何足計焉。

朱百年家貧。母以冬月亡。衣無綿絮。百年自此  
不衣綿帛。嘗寒時。就孔顓宿。衣悉袂布。顓覆  
以臥具。百年初不知。旣覺。引去。謂思遠曰。綿  
定奇溫。因流涕悲慟。思遠亦爲感泣。

吳郡陳遺母好食鰾底焦飯遺作郡主簿製一囊每煮飯輒貯焦飯遺母後值孫恩賊出吳郡袁崧卽日便征遺已斂焦飯數斗未展歸家遂帶以從軍戰於淝濱敗軍人竄山澤多饑死遺獨以焦飯得活人謂純孝之報

汜毓家世敦睦客居青州逮毓七世人號其家兒無常父衣無常主

李瓊娶妻有子而移居母之室夜常十餘起母

每諭之曰。汝年來筋力頗憊。盍求婢以侍我。  
瓊曰。凡母所欲。不親經手。意如有失。其母遂  
不之強。以是家人無敢怠惰。

巴郡杜季少失父。以至季稱。後在成都。母喜食  
生魚。季乃截大筒盛魚。二頭塞以草。投中流。  
呪曰。我母必得此魚。後婦出汲。見筒觸岸。取  
視。有二魚。笑曰。此吾夫所記也。熟而進之。聞  
者嘆異。

法昭禪師偈云。同氣連枝。各自榮些些。言語莫傷情。一回相見。一回老。能得幾時爲弟兄。

蔡京專政。子攸勢與父軋。父子各立門戶。攸別居。賜第一日詣京。遽握父手爲切脈狀。曰。大人脈勢舒緩。得無恙乎。京曰。無之。攸卽辭去。客見以問京。京曰。此兒欲以爲吾疾而罷我耳。越數日。果以魯國公致仕。長州一丐兒。每詣沈孟淵處。請丐所得多。不食。沈異之。憫所

往○至○野○岸○一○舟○雖○陋○頗○潔○中○有○老○母○丐○出○物○  
陳○母○前○傾○酒○跪○奉○伺○母○持○杯○方○起○跳○舞○唱○山○  
歌○嬉○戲○以○娛○母○常○日○如○之○母○死○丐○不○復○見○夫○  
攸○亦○人○子○丐○亦○人○子○與○其○爲○攸○也○父○孰○若○爲○  
丐○也○母○哉○

王祥孝事繼母人所知也祥弟覽卽繼母所生  
勞苦與祥俱母以酒毒祥覽先取飲之母驚  
覆酒覽娶婦亦與祥婦均服役卒能調和母



子如一人知祥之孝而不知覽之慘乃所以  
爲孝也。呂虔有劔相其文佩者至三公以奉  
祥曰非君莫可當者祥薨解以與覽後九代  
公卿噫使覽而阿親意則象耳可爲孝子乎  
五刑莫大不孝王法誅之冥律禁之其特甚者  
則有四等父母待孝尤切曰老曰病曰鰥寡  
曰貧乏父母當壯盛起居猶能自理至龍鍾  
鵠立扶杖易仆寒夜苦寂鐵骨難挽又如偏

風久病。坐臥不適。遺洩叢穢。蒲薦可憎。子所  
難奉。惟此時。親所賴。子亦惟此時。又如老境  
失耦。寒煖誰問。丈夫猶可。嫠婦奈何。就使兒  
孫滿前。耦者耦。稚者稚。人人鼾睡去。箇箇樂  
事歸。漏聲長處不可聞。枕邊淚濕與誰同。有  
孝兒孫。頗娛晚景。不幸而母我者。棄。慣。澈。潑。  
姑我者。橫面阻絕。祇護半點骨血。空博一世  
淒涼。又有撫字財匱。婚娶力竭。健少年經營。

肥煖老窮人搔首躊躇望一味以垂涎丐三  
食而忍氣吁嗟身從何來而長養若是此數  
老冤氣猶足動天子孫倍當行孝勸化者於  
斯更喫緊云

歐公池嫡母所生兩兄皆庶出父以公屬嫡欲  
厚之公妻馮氏請於舅曰嫡庶爲父母服有  
差等否舅曰無馮曰均子也服無差產其可  
異乎舅大悅從之後累世簪纓

張翁用川。邦奇公父也。公爲學憲時。廳僅二楹。上官過訪。不便。旁一楹。廼其叔居。叔有宿適。願售。公倍價買之。將重構焉。告於翁。翁知其倍也。甚悅。已。忽潸然淚下。曰。吾想至日。拆彼屋。以豎我柱。其夫婦何以爲情。公惻然曰。兒當還之。遽抽身取券。翁曰。其價計已償人矣。公曰。併價不取可也。翁欣然曰。若然。慰我甚矣。

侍郎梅溪王公見人禮塔呼而告之曰汝有在家佛何不供養

崔沔有至性母失明傾家求醫不脫冠帶奉者三十年每美景良辰必扶持宴笑母忘其所苦也母卒瘠形吐血茹素終身愛兄姊幾於母慈甥姪甚於子所得俸於奉蒸嘗調親族盡之一不以自奉也

趙彥霄與兄彥雲同癸十二年彥雲游浪廢業

霄諫不聽遂求折箸未幾兄蕭然逋負盈門  
除夕霄置酒迎兄嫂曰弟無分爨意以兄不  
節敬爲守先業之半亦足給伏臘請歸仍主  
家政卽取分券火之付以筦鑰更出所蓄償  
諸負者兄慚受而易轍焉

薛包好學篤行父娶繼母憎包分出包日夜號  
泣不得已廬舍外旦入灑掃父母又逐之乃  
廬里門晨昏問安積歲餘父母悟而命還及

父母亡。哀痛成疾。諸弟求異居。包不能止。任弟所欲。奴婢引其老弱者曰。與我共事。久使令所熟也。器物取其朽敗者曰。我素所服食。身口所安也。田產取其荒蕪者曰。吾少時所治。意所戀也。諸弟不能自立。致破家產。包復賑給。安帝聞其名。徵拜侍中。不受。賜穀千石。胡寔。桂爲鉛山主簿。時私醋之禁甚嚴。有婦訴姑私釀者。寔桂詰曰。汝事姑孝乎。曰孝。曰既。

孝可代汝姑受責以私醋律笞之政化大行  
不孝習成有四一曰私財財入吾手便爲吾有  
而在父母手者又謂吾得有之也財足則忘  
親財乏則覬親求財不得則怨親甚且以單  
父隻子而爭財囉唆者有矣少長互推而棄  
親不養者有矣不知身誰之身我亦帶一財  
來而襁哺無缺以至今日誰爲者乎二曰戀  
妻子妻子習狎而父母嚴重也美味錢財欲



娛妻寵子。佳會良辰。欲擁妻抱子。而寧親之  
念。遂微也。不思子爲我子。而我爲誰子。親念  
我。不顧則我亦何賴有子哉。夫妻故聚樂。然  
當呱呱待哺時。豈解戀妻。卽妻能擁我生活  
耶。辛勤字我。指望有婦得稱成人。代勞貽燕  
乃有婦。而親反不得有子耶。三曰嫖蕩。欲火  
正熾。客誘如狂。有倚廬傷心者。不解也。家業  
浪費。婦姑勃蹊。有激聒誚讓者。不辨也。懷子

不寐風雨淒長夜之魂垂白無歡菽水冷半  
生之奉吁嗟狂興幾何忍令有此四曰爭妒  
天地之大人猶有憾父母之子衆子也情豈  
無偏乃攘臂爭分側目奪寵或兄弟而觭觔  
或姊妹而計較護短爭長分曹伐異相讒蠱  
而蒙道睽積嗔喜而孝情薄矣此四者人之  
常情人子不免其流遂至大不孝吁可惕哉  
興盛之家長幼多和蓋所求皆遂無相爭也破

蕩之家。妻孥無過。家長每苛求積鬱。無所洩。惟可施於妻子也。知此則父兄當保家。而子弟處此。倍須孝敬矣。高年人動靜恍惚。嬰兒喜得微利。喜受服食小惠。喜與孩童玩狎。子孫體此。不難盡致其歡。

宋元嘉中。吐谷渾王阿柴有子二十人。疾病命諸子各獻一箭。以一箭授弟。慕利延使折之。利延折之。又取十九箭使折之。利延不能折。

乃諭之曰汝曹知之乎孤則易折衆則難摧戮力同心然後保國

原穀有祖年老父母厭憎欲棄之穀年十五諫不從作輿舁祖棄於野穀隨收輿歸父曰爾何收此凶具穀曰他日父母老不能更作此具是以收之父感動乃載祖歸養

設義塚以葬宗族之無地者立義祠以祭宗族之無後者置義田以贍宗族之無養者皆美

事也。饒裕之家當力爲之。

浙有孝子。事母有至性。薄業俱廢。以養母。其從父。一日飲諸姻貴。饌甚腆。呼孝子侍。孝子時時左右。眎伺賓所。不顧急。摘諸甘脆。累納袖中。酒酣。主人出金卮勸客。客不勝酒。卮置樓簷間。逃歸。俄侍者報失。卮衆客請局戶。令人袒揆孝子。捫袖中。至羞澀也。卽謬曰。由我無何。逃客憶前卮。乃折簡以語主人。主人檢得。

急呼孝子至。孝子猶謬對如初。從父曰：癡兒。吾已得卮矣。何苦自誑。孝子始以實告。淚淋漓下曰：某苦不能勉奉母氏。慙而兒女態。若此。設令貴客把我袖。我且重爲叔父羞。故寧爾爾。從父大感悟。乃遍語前客曰：是子如是。吾不忍使孝子無以悅親。分產令終養焉。

杜五郎所居屋兩間。前空地丈餘。卽爲籬門。不出門者三十年。黎陽尉孫輅訪問其生計。對

曰昔有阪田與兄同耕迨兄子娶婦度不足  
贍乃盡以與兄而携妻子至此僦屋居之與  
人擇吉醫藥聊供飢粥有時不繼云

何宇新母死廬墓家無三尺童畜一黃犬三五  
日輒候墓所每有所需卽書片紙繫其頸家  
人見之具備繫使負還

家不和多因婦以言激夫非丈夫有遠識則爲  
其役而不覺於是有骨肉至死不相往來者

有無子而不肯以猶子爲後有多子而不肯  
與其兄弟者有不恤兄弟之貧必欲供膳如  
一寧棄親而不顧葬親必欲均費寧留喪而  
不恤者有爲小姑則譖嫂於母爲嫂姪則譖  
姑於夫者事難殫述不知我旣入人家同穀  
同穴長與此家傳世待舅姑處卽是兒婦待  
我樣子待叔伯妯娌處卽是我兒婦相處家  
法日與人親厚好恩情豈不快活赤面相向



有甚佳趣。要不過忍些氣。破些零錢。而已。我  
饒人。人必知。一時不知。後亦自知。縱彼人不  
知。旁觀諸親。感我盛德。無不周知。而彼亦終  
於知也。吁。和氣致祥。刑于之風。可少哉。

家不和。多繇婦構其原。又多出婢妾。蓋彼輩愚  
賤無識。以言他人之短失。爲忠於主母。稍一  
聽信。必日造虛妄。使主母與人深仇。而彼始  
揚揚得志。自暱處於心腹也。惟僕隸亦然。主

翁聽信則族戚故舊皆失歡而善良佃僕反  
一致譴責矣。

祠部尚書蔡廓奉兄軌如父家事大小皆諮而  
後行公祿賞賜一皆入軌有所資須悉就典  
者請焉從武帝在彭城妻郝氏書求夏服時  
軌爲給事中廓荅書曰知須夏服計給事自  
應相供無容別寄郝使廓從妻言乃乖離之  
漸也。

秦母柴氏。秦閨夫繼室也。生一子。與前妻一子。俱幼。閨夫病且死。以前妻子囑之。柴氏鞠育。無異心。辛勤紡績。遣二子就學。至正中有惡少殺張福家屬者。福訴於官。連柴氏長子。法當誅。柴氏引次子詣官。泣訴曰。殺人者吾次子。非長子也。次子曰。我之罪可加於兄乎。鞫之。至死不易辭。官反疑次子非柴所出。訊之。他囚始得其情。官義柴氏之行。歎曰。妻割愛。

以從夫言子趨死以從母志此天理人情之至也遂併二子俱釋之有司上其事旌其門而復其家

張氏二難者孟仁妻鄭妙安仲義妻徐妙員也徐富而鄭貧皆敦義睦貧者不諂富者不驕恒於一室紡績尺帛寸絲不入私房徐父家時有所饋必納於姑所用則請而取之不問孰爲已物也鄭歸寧徐乳其子徐歸寧鄭乳

其子不問孰爲己子。雖諸兒亦不知其孰爲己母也。家畜一猫一犬。猫爲人所竊。犬取猫子。乳之人以爲和氣所感。太平間表其門爲二難。

顏氏家訓曰。二親旣歿。兄弟相顧。當如形之與影。聲之與響。愛先人之遺體。惜己身之分氣。非兄弟何念哉。兄弟之際。異於他人。望深則易怨。地親則易狎。譬猶居室一穴。卽塞一隙。

卽塗則無類毀之慮。如雀鼠不防風雨不備。壁陷楹淪無可救矣。僕婢之爲雀鼠妻妾之爲風雨甚哉。

王審上郡人也。嘗與弟儁子元直於涼州路中。糧匱。審留儁元直於途。乞丐民間。比還。儁爲賊所掠。元直逃免。審乃將元直追賊。叩頭求哀。曰。人情自愛其子。但此弟未生家。君見背。孤遺相長。以至於今。請以元直易儁。賊相謂。

曰以子易弟。義之大也。以雋元直授密而去。密後亡。雋勺水不入口者七月。雖服喪。基年而心喪。六載。

陳蕃爲樂安太守。時有趙宣者。親旣葬而不閉。塋。祔。因居其中。行服二十餘年。鄉邑稱孝。州郡皆以禮敦請。蕃就而訪之。見其五子皆自服中產。因大怒曰。聖人制禮。賢者俯就。不肖者企及。故祭不欲數。以其易黷故也。況乃寢。

宿冢藏孕育其中乎。誑時惑衆莫此爲甚。遂致之罪。

阮孝緒於鍾山聽講。母忽有疾。兄弟欲召之。母曰。孝緒至性冥通。必當自到。果心驚而還。

廣漢姜詩妻者。同郡龐盛之女也。詩事母至孝。母好飲江水。水去舍六七里。妻常沂流而汲。後值風。不時得還。詩見母渴。責妻而遣之。妻乃寄止鄰舍。晝夜紡績。市珍羞。使鄰母時時。



以意自遺其姑久之姑怪之鄰母具以對姑  
感而慙乃卽呼還詩有子後因遠汲溺死妻  
恐姑哀傷不敢言而託以行學一時不在  
殷陶汝南人年十二遭父憂有長蛇帶其門舉  
家奔走陶以喪柩在獨居廬不動

平王爲太子製爲長枕大衾日與諸王臥起於  
宮西南置樓西曰花萼相輝之樓南曰勤政  
務本之樓上時登樓聞諸王作樂則召升樓

相與同榻而坐。或就而幸之。賦詩燕飲。賜與金帛。極歡而罷。諸王日朝側門。旣歸。卽具樂歡讌。或擊毬。或時鬪雞。馳逐鷹犬。所至上。輒遣使勞賜。相踵也。世謂天子友愛。古無有者。張敷生母亡。數歲聞之。雖童蒙便有慕感之色。至十歲許。求母遺物而散施已盡。惟得一畫扇。乃緘錄之。每至感思。輒開筭流涕。司馬髡幼有至性。丁內艱。水漿不入口。梁帝見

高羸瘦。謂其父子產曰。昨見羅兒。傷其憔悴。使人惻然。便是不墮家風有子矣。

太子弘爲武后長子。受春秋左氏於郭瑜。至楚世子商臣弑其君。喟而廢卷曰。聖人垂訓。曷謂書此。瑜曰。聖人作春秋。要使惡名不得滅於後世耳。弘曰。然所不忍聞也。願讀他書。瑜拜曰。里名勝母。曾參不入。殿下睿孝天性如此。臣聞安上治民。莫善於禮。請改受禮。太子

曰善

漢趙至蚤起誦書聞父嘐叱牛聲釋書而泣師  
問之荅曰自傷不能致榮華而使老父不免  
勤苦

胡惟庸既敗四方有仇怨告訐者率指爲胡黨  
坐重獄及是有訴鄭湜兄弟交通惟庸者湜  
兄弟六人吏捕之急諸兄弟欲行湜曰弟在  
其恐使諸兄罹刑律獨請吏請行仲兄濂先

有事京師。弟至。迎謂曰。吾家長當任罪。弟無與焉。湜曰。兄老。吾往辯之。萬一不直。弟當服辜。二人爭入獄。

太祖聞之。俱召至。延勞勉之。謂近臣曰。有人如此。而肯從人爲非耶。卽宥之。詔賜酒食。擢爲叅議。賜冠帶襲身。

昨非菴日纂詒謀卷之五

粉壁璇題。居停主。曾有幾時。五更燈火。爲孫  
謀。誰來禡奪。銅山金穴。田舍翁。終無百世半。  
畝心。田承祖。澤那箇。墜傾。昔賢謂積書以遺。  
猶非遠計。顧令納邪。長傲。甘祇。憤以忝厥先。  
猷乎。纂詒謀第五。

昨非菴居士鄭瑄識

唐太宗謂侍臣曰。朕自立太子。遇物則誨之。見

其飯則曰汝知稼穡艱難則常有斯飯矣見其乘馬則曰汝知其勞不竭其力則常得乘矣見其乘舟則曰水以載舟亦以覆舟見其息於木下則曰木從繩則直君從諫則聖

宋杜孟遊太學因童貫蔡京用事憐然而歸嘗訓子孫曰忠孝吾家之寶經史吾家之田時號爲實田杜氏

廣受歸賣金置酒與族戚娛樂或勸爲子孫立

業廣曰。吾豈不念子孫哉。顧有舊田廬。令勤力其中。足供衣食。復增以贏餘。祇教其惰耳。賢而多財。則損其志。愚而多財。則益其過。且富者怨之府也。吾旣無以教子孫。不欲益其過。而招怨。且此金者。以惠老臣耳。吾與族黨共饗以盡餘年。不亦可乎。

李景讓爲浙西觀察。因杖殺一左都押衙。軍中憤欲爲變。其母出坐廳事。立景讓於庭責之。



曰。天子付汝方面。豈得妄殺萬一。致一方不寧。豈惟負天子。且愧先人矣。命左右褫衣。欲撻其背。將佐皆泣。拜爲請。至久。乃釋。軍中遂定。

程大中公。晌性寬而斷。夫人謙順自牧。治家有法。不喜鞭扑奴婢。諸子或加呵責。必戒曰。貴賤雖殊。人則一也。公或有怒。必爲寬釋。唯諸子有過。則不掩也。曰。子所以不肖。由母蔽過。

而父不知耳

朱文公居家四本。讀書起家之本。勤儉治家之本。和順齊家之本。循理保家之本。

顏氏家訓曰。士夫子弟。耻農商。羞工伎。射。旣不能穿札。筆。則纔記姓名。飽食醉肉。以此終年。或因世家餘緒。得一官半級。便自爲足。全忘修學。及有吉凶大事。議論得失。蒙然張口。如坐雲霧。公私宴集。談古賦詩。塞默低頭。欠伸。

而已。有識旁觀。置身無地。何惜數年勤學。長受一生愧辱哉。

溫公與姪帖。近蒙聖恩。除門下侍郎。舉朝忌者無數。而獨以愚直處其間。如一黃葉在烈風中。幾何不墜。是以受命以來。有懼無喜。汝輩常識此意。倍須謙恭退讓。不得恃勢作不公不法。擾官司。凌小民。使鄉人厭苦。則我禍皆起於汝輩。而汝輩亦不免也。

魏主昶爲書戒子姪曰。郭伯益好尚通達敏而有智。得其人。重之如山。不得其人。忽之如草。吾愛之。親之。不願兒子爲之。北海徐偉長不沽名。不苟得。澹然自守。惟道是務。有所是非。則託古人以見意。吾欽之。重之。願兒子師之。唐李景讓母鄭氏。性嚴明。早寡。家貧。子幼。自教之。宅後牆陷。得錢盈船。母視之曰。無勞而獲。身之災也。天如以先君餘慶。矜貧而賜之。則

願諸孤學問有成。此不敢取命。掩焉。景讓宦達。髮已斑白。小有過。不免捶楚。

溫公曰。光幼時弄胡桃。女兄欲脫其皮。不得。女兄去一婢。以湯脫之。女兄來問。光曰。自脫也。先公適見之。呵曰。小子何得謾語。光自是不敢謾語。

陳顯達爲江州刺史。自以門寒。位重。每遷官。常有愧懼之色。戒其子。勿以富貴陵人。諸子猶

事豪侈。顯達曰：塵尾蠅拂，是王謝家物。汝不須捉此取而燒之。

顏氏家訓云：梁朝全盛之時，貴游子弟多無學術。熏衣剃面，傅粉施朱，駕長簷車，躡高齒屐，從容出入，望若神仙。求第則僱人答策，公燕則假手賦詩。當爾之時，亦快士也。及離亂之後，朝市遷革，銓衡無曩日之親，當路非昔時之黨。求之身而無所得，施之世而無所附。被

禍而喪珠失皮而露質當爾之時誠驚才也  
唐李勣寢疾謂弟弼曰我見房杜平生勤苦僅  
立門戶遭不肖子蕩覆無餘吾以諸子付汝  
謹察視之有志氣不倫交游非類者當先撻  
殺之然後以聞

王文正公旦以儉約勵子弟使富貴不爲驕侈  
兄子睦欲求舉進士公曰吾嘗以太甚爲懼  
其可與寒士爭進至其薨也子素猶未官

養子弟如養芝蘭。既積學以培之。又積善以潤之。父子間不可溺小慈。自少律以嚴繩。以法則長。無不肖之悔。

韓億知亳州。次子爲西京判。謁告省覲。公喜置酒召僚屬。俾諸子隅坐。忽問西京有疑獄奏讞者。其詳云何。舍人思之未得。遂索杖大詬曰。汝倖貳一府事。無巨細皆當究心。大辟尚不能記。則細務不舉可知。必欲撻之。衆賓亦



解方已。

胡安國子弟或出宴集。雖夜深不寢。以俟其歸。驗其醉否。且問所集何客。所論何事。有益無益。以是爲常。

柳玘戒子弟曰。凡門第高。可畏不可恃也。立身有失。得罪重於他人。死無以見先人地下。此所可畏也。門高易驕。族盛招忌。懿行人未之信。少有疵隙。衆指乘焉。此所不可恃也。故膏

梁子弟學加勤。行加勵。僅得比他人爾。

陸象教家。每晨揖三過。鼓子弟一人唱云。聽聽聽。勞我以生。天理定。若還懶惰。必饑寒。莫到饑寒方怨命。虛空自有神明聽。又唱云。聽聽聽。水食生身。天付定。酒肉貪多。折人壽。經營太甚。違天命。

曾子之妻戲子以殺彘。而烹彘以實其戲。孟子之母。欺子以啖肉。而買肉以明不欺。古人養

蒙之法如此

裴晉公常訓其子云凡吾輩但令文種無絕間  
有成功致身萬乘則天也

富貴統袴之子少而聰穎援筆立賦睥睨千秋  
心滿氣盈已不勝骯髒之習而食客遊士又  
從而諛之一文出奴僕班揚一詩成伯仲李  
杜夜郎王何知漢大富貴凌人而才俊濟  
之角蛇翼虎釀成淫毒至覆國傾家而罔悔

反不如椎魯無文者之猶能自存也。余嘗與貴豪言見其縱衡飄忽日無所不空口無所不擊自三教聖人而下不能免椎詈又岸然自謂手金剛杵所當亡不碎者而方盛有時名雙睫如炬電光其舌傷人雖欲與一語柝不得入嗟乎富貴之爲害至此余願士大夫教子先坊以禮義教以謙抑而後課以藝文責以古今一事之能無輕獎一語之俊無妄

月  
誇是眞能愛子弟者也

奔車之上無仲尼覆舟之下無伯夷性之者也  
孔子家兒不識罵曾子家兒不識鬪習之者  
也丹朱不應乏教甯越不聞被箠語其變也  
北齊安德王延宗幼爲文宣所養甚愛之年十  
二猶騎置腹上令溺已臍中抱之曰可憐止  
有此一箇封定州刺史於上大便秘使人在下  
張口承之後爲周武帝見擒誣反以椒塞口

而死。芒山有盜臨刑。母與訣。盜對母云。願一吮母乳。死且無憾。母與乳。盜嚙斷乳。頭血流。母死。盜告刑者曰。吾少也。盜一菜一薪。吾母見而喜之。以致有今日也。嗚呼。教子嬰孩。豈虛語哉。

鄭奕嘗以文選教子。其兄曰。何不教以孝經論語。免他學沈謝嘲風咏月汗人行止。

唐太宗泛遊春苑。愛奇鳥。閣內傳呼畫師問立。

本應旨畢。退戒其子曰。吾少讀書。屬詞。今以丹青躬廝役之務。辱莫大焉。爾宜深戒。韋誕奉帝命書匾。以寵盛之。輓轡而上。去地二十五丈。寫竟。鬚眉盡白。戒子孫勿學此法。

犁牛之子。山川不舍。犁牛以爲不肖。山川以爲肖也。爲父者。令人以肖已爲不肖。則父爲何如人哉。厲人夜半照子。惟恐其似已也。此一念能還白照矣。

顏延之見竣既貴重權傾一朝凡所資供延之  
一無所受常乘羸牛敝車逢竣鹵簿卽屏往  
道側嘗語竣曰吾平生不喜見要人今不幸  
見汝竣起大宅延之謂曰善爲之無令後人  
笑汝拙也

朱文公與卓夫人書云聞尊意欲爲五哥經營  
幹官差遣某竊謂不可子弟生長富貴本不  
知艱難一旦仕宦便爲此官無不傲慢縱恣



觸事。慴然。愚意。營一。稍在人下。執事。喫人打。罵。差遣。乃所以。成就之。

劉宋徐湛之。武帝長女。會稽公主之子也。帝微時。貧甚。有衲布衣襖。皆敬皇后手作。帝既貴。以此衣付公主。曰。後世有驕奢者。以此示之。及文帝欲殺湛之。主以錦囊盛衲衣。示上。曰。我母爲汝父作此衲衣。今日有一頓飽飯。便欲殺我兒耶。遂得免。

柳世隆盛事蹟典安貧守分張緒曰君當以清  
名遺子孫耶答曰一身外何所須子孫不才  
將爲爭府如其才也不如一經

祝氏訓子有云憶昔吾兄弟丁爾兄弟之年方  
且頂斗笠向赤日中採山灌圃形容黧醜吾  
十有九歲始授書爾叔受書更後吾兩人夏  
無葛冬無爐朝夕不輟以有今日而爾兄弟  
乃得垂髫就傅把舊書向北窗下披風而哦

免於樵圃之苦。是爾兄弟受享過吾兄弟遠甚。而或劬勤少避。可不可乎。警吾言。勿等於過耳。訥也。

余嘗見取富室之女者。驕奢淫佚。動笑夫家之貧。務逞華靡。以圖勝人。一切孝公姑。睦妯娌。惠臧獲。置弗預聞。曾幾何時。而奩橐俱罄。怨天尤人。譟擾萬狀。其夫雖沾餘沫。而舉動受制。笑啼不敢。至於愚昏沮喪。甘爲人下。而不

辭者未必不由此也

陳了翁日與家人會食男女各爲一席食已必舉一話頭令家人荅一日問曰並坐不橫肱何也孫女方七歲荅曰恐妨同坐者

壽昌胡彥持家子弟不得自打童僕婦女不得自打婢妾有過則告之家長爲之行遣婦女擅打婢僕則撻子弟此賢者之家法也

祖宗富貴自詩書中來子孫享富貴則賤詩書

矣。祖宗家業自勤儉中來。子孫得家業則忘勤儉矣。此所以多衰門也。戒之。

顏氏家訓曰。讀書總不能大成就。猶爲一藝。得以自資。父兄不可常依。鄉國不可常保。一旦流離。無人庇蔭。當自求諸身耳。

泰和羅文莊公。兄弟叔侄先後相繼。咸登高第。公繇冢宰歸養。庭訓甚嚴。仲子謁選。乞書貽當路。圖仕南方。以便省問。公曰。數字不足惜。

惜認義命二字欠確耳平生訓汝謂此而有是言竟不與書

沈氏衷言有云吾嘗茅茨而今大厦吾昔僅一夫之田而今連數井之壤吾昔猶奔走衣食而今則安享富厚吾分已踰吾又何求惟知止知足守理守法以上培先德下啓後人卽神祐可延家聲不墜若猶復貪得未已競進不休居已侈而猶恢田已多而務廣強之鬻

不出其本心與之直不合乎公道或逼債以  
傾人之產或牽牛以蹊人之田或縱牙爪於  
通衢或逞報復於私忿諸如此類猶自多端  
總之我漁利下人亦乘機以規利我行惡下  
人更借勢以助惡乃遂使孤獨鰥寡忍氣吞  
聲道路里隣旁觀側目顧猶且揚揚得意自  
矜謀畧豈知神目如電法網不疎衆指交加  
不摧自仆當斯之際悻入不免悻出多藏亦

復厚亡室雖廣而不得寧居川雖多而不能  
安享累及妻孥玷及祖父欲益反損欲進反  
却得乎失乎利乎害乎

柳公綽治家嚴肅晨省昏定子弟皆束帶以見  
遇饑歲則諸子皆蔬食曰昔吾兄弟侍先君  
爲丹州刺史以學業未成不聽食肉吾不忍  
忘也姑姊妹姪有孤嫠者雖疎遠必爲擇婿  
嫁之皆用刻木爲粧奩纈文絹爲資裝常言



必待資裝豐備何如嫁不失時

閨門之中少丁箇禮字便自天翻地覆百禍千殃身亡家破皆從此起

顏氏家訓曰愛子不均古今通弊也不知賢固可愛愚亦可憐有偏寵者雖欲以厚之實所以禍之共叔之死母實爲之趙王之戮父實爲之劉表之傾宗覆族袁紹之地裂兵亡可爲明鑒也

柳玘述家訓以戒子孫曰壞名災已辱先喪家  
其失尤大者五其一自求安逸靡甘澹薄不  
恤人言其二不知儒術不說古道惜前經而  
不耻論當世而解顧身既寡知惡人有學其  
三勝已厭之佞已悅之聞人善嫉之聞人惡  
揚之浸漬頗僻銷刻德義簪裾徒在廝養何  
殊其四好優游嗜麴藥以銜杯爲高致以勤  
事爲俗流覺已難悔其五急於名宦匿近權

要一資半級。雖或得之。衆怒羣猜。鮮有存者。  
予見名門右族。莫不由祖先忠孝勤儉以成。  
立。莫不由子孫頑率奢飲。以覆墜。成立難如。  
升天。覆墜易於燎毛。言之痛心。爾宜刻骨。

王荊公教元澤求館賓。須博學善士。或謂發蒙。  
何必爾。公曰。先入者爲之主。

蘇子瞻生十歲。而父洵宦學四方。母程氏嘗讀。  
東漢史。至范滂傳。軾時侍側。曰。軾若爲滂夫。

人亦許之乎。母曰：汝能爲滄，吾顧不能爲滄。母邪？

杜暹藏書，皆自題跋。曰：清俸買來，手自校子。孫讀之，知聖教，鬻及借人，爲不孝。

孫權召顧雍父子及其孫譚飲。譚時爲選曹尚書，見任貴重。是日，孫權飲極懽。譚醉三起舞，舞又不止。雍內怒之。明日，召譚呵責之，曰：君王以舍垢爲德，臣下以恭謹爲節，何有舞不

明辨者集 卷八  
復止。雖爲酒後。亦由恃恩。損吾家者。必汝也。  
劉安世初除諫官。入白母。母曰。諫官天子諍臣。  
汝父欲爲而弗得。汝今幸得居此。當捐身以  
報國。若得罪。流放無問。遠近吾當從汝。故安  
世在職。累廷爭。或帝盛怒。則執簡却立。伺怒  
稍解。復前抗辭。旁觀者蓄縮悚汗。咸曰。爲殿  
上虎。

王長史騫。太尉儉之子。騫至性凝簡。不狎當世。

嘗語諸子曰。吾家門戶。所謂素族。自可隨流平進。不須苟求。

楚王英逆謀事發。株連以千計。吳郡太守尹興亦被株及。乃徵興及掾吏五百餘人。詣廷尉考掠死者大半。唯門下陸續主簿梁鴻功曹史駟勲。備受五毒。肌肉消爛。終無異辭。續母自吳來雒陽。作食以饋續。續雖見考。辭色不變。而偶對食。悲泣不自勝。獄使問故。續曰。母

一○來○不○得○見○故○悲○耳○問○何○以○知○之○續○曰○母○截○肉○  
未○嘗○不○方○斷○葱○以○寸○爲○度○故○也○使○者○以○聞○上○  
乃○赦○典○等○

徐○勉○戒○子○書○曰○吾○清○明○門○宅○西○邊○旣○施○與○宣○武○  
寺○不○復○方○幅○常○怪○時○人○謂○是○我○室○古○往○今○來○  
豪○富○繼○踵○脫○其○死○矣○知○是○誰○室○